

## UN PERSONAXE MISTERIOSU

Yera eso, un personaxe misteriosu.

Tendría ochenta años. O más, que yo pa eso soi mui mala calculando. Y pasaba per delante'l mostrador, mui sele, mirando pa nosotres como de regüeyu. Como si quixere entrugar dalgo pero ensin atravesese a ello.

Yera la época na que trabayaba na Biblioteca de la Universidá, un par d'años enantes de marchar d'Uviéu siguiendo a Esteban nuna deriva que sabía que nunca nun diba a llegar a bon puertu. Taba cantao, dicíame la familia cuando me dexó por una compañera del llaboratoriu más moza que yo. Pero había que tar nel mio pelleyu pa dar por finada una rellación na que yo punxere tanta carne nel asador.

Y nun sé por qué, agora que pasó yá abondu tiempu, alcuérdome del paisanín misteriosu que surdió los caberos díes enantes de dexar el puestu y colar en pos d'aquel fatu que nun me merecía. Igual aquella anéudota yera un badagüeyu de lo que llueu diba a pasar y yo nun fui a interpretalo.

Daquella trabayaba con Blanca y llevábamonos perbién, ella fue una de les que m'avisó de lo que podía pasar si dexaba'l puestu y diba a Barcelona en pos d'un tío.

-Blanca, nun ye un tío, ye Esteban. Llevamos xuntos dos años.

-Lo que yo te diga, amiguina, un tío. Toos son iguales.

Yo dexaba la cosa ehí porque Blanca yera mui testerona y porque, amás, taba empezando a duldar del aciertu de lo que diba a facer. Nun quería que naide m'influere negativamente. Teníalo decidío y yá taba. Quería a Esteban y el quería a min. Lo demás non cuntaba.

Pero taba colo del paisanín misteriosu, que nun sé mui bien por qué víenoseme agora al maxín.

Yo fixárame nel intre n'el. La mayoría de los que sacaben y devolvien llibros yeren alumnos, de más o menos edá, pero mayormente mozos. Y llueu taben los profesores pero a esos conocíamolos a toos. Poro, un señor mayor, de pelo blanco y abrigo llargu, que pasaba tolos díes per delante de nosotres mirándonos pero ensin dicir

nada, tenía que llamar l'atención. Polo menos la mía, porque la mio compañera taba siempre enfotada en recoyer y reponer llibros y consultar fiches nel ordenador.

Por fin, un día decidióse. El paisanín, digo. Un día decidióse. Allegóse al mostrador y carraspió. Llevaba dalgo na mano. Un oxetu envueltu en papel d'estraza.

Blanca siguía trabayando nel ordenador, asina que fui yo la que-y dixo:

-Bonos díes, ¿qué desea?

Agachóse sobre mí y díxome como al escuchu:

-Verá, señorita ye que tengo un llibru de la biblioteca y quería devolvedu.

-¿Un llibru? Bien, pues démelu y miramos.

-Ye que ye un llibru especial.

-Tolos llibros son especiales. Vamos, pásemelu.

El paisanín punxo l'oxetu sobre'l mostrador y quitó-y l'envoltoriu. Yera un calderín colo que paecía arena de la playa.

Ante'l mio asombro, derramó l'arena enriba'l mostrador y dixo:

-Bueno, ehí lo tien: nin mas nin menos que'l Llibru d'Arena de Borges.

FIN

Hipatia

